


**U ovom broju, između ostalog, čitajte:**


- **Zaključci video konferencije „Nužnost kreiranja novog seta mjera za saniranje ekonomskih posljedica pandemije koronavirusa“**
- **Delegacija UPFBiH sa predsjednikom HDZ-a BiH**
- **Na inicijativu UPFBiH Vlada FBiH utvrdila Prijedlog zakona o dopunama Zakona o vijeću zaposlenika, te donesena Odluka o prestanku važenja Odluke o propisivanju mjera neposredne kontrole cijena**
- **UPFBiH uputilo dopis Ministarstvu finansija u vezi nemogućnosti dobijanja potvrde o izmirenim obavezama po osnovu javnih prihoda, koja im je neophodna za učešće na tenderima**
- **Usvojena inicijativa UPFBiH da pravo na isplatu dijela minimalne neto plaće imaju i privredni subjekat koji imaju sjedište u drugim kantonima, a poslovne jedinice u KS**
- **UPFBiH traži da se za utvrđivanje pada prometa izuzme promet po osnovu prodaje sopstvene imovine**

## Video konferenciju "Nužnost kreiranja novog seta mjera za saniranje ekonomskih posljedica pandemije koronavirusa"



Udruženje poslodavaca FBiH organizovalo je 03. juna 2020. godine video konferenciju "Nužnost kreiranja novog seta mjera za saniranje ekonomskih posljedica pandemije koronavirusa". Na konferenciji su učestvovali ministri Vlade FBiH, odnosno ministar za razvoj, poduzetništvo i obrt FBiH Amir Zukić i ministar trgovine FBiH Zlatan Vujanović, zastupnici i delegat Elvir Karajbić, Adis Arapović i Aner Žuljević, eminentni profesori Vjekoslav Dowljan, Ante Domatez, Matej Živković, Aziz Šunje i Nikolina Obradović, savjetnik premijera Vlade FBiH Goran Miraščić i direktor Federalnog zavoda za programiranje razvoja Ljubiša Đapan. Ispred organizatora, na konferenciji su učestvovali članovi UO UPFBiH Safudin Čengiđ, Snjezana Koepruner i Adnan Smailbegović, te članovi Udruženja Muhamed Pilav i Indira Omeragić.

Moderator konferencije, direktor UPFBiH Mladen Pandurević, je u uvodnom obraćanju



napomenuo da je cilj konferencije da šira društvena odnosno akademska zajednica bude uključena u iniciranje kreiranja mjera za saniranje ekonomskih posljedica pandemije koronavirusa, te da se identifikuju prednosti i nedostaci prethodno usvojenih mjera Vlade FBiH.

Vjekoslav Domljan je u uvodnom obraćanju prezentovao analizu posljedica koje je pandemija koronavirusa ostavila po europsku i bh. ekonomiju, kao i mjere koje su vlade europskih i zemalja regije poduzele za saniranje ekonomskih posljedica pandemije. Naglasio je važnost brzine donošenja mjera i valjano targetiranje. Međutim, poslodavci su istakli da mjerama koje su usvojile entitetska i kantonalne vlade nije izjednačen status uposlenika u javnom i realnom sektoru, odnosno da je teret krize prevaljen isključivo na realni sektor. Čengić je predložio da se sazove hitan sastanak na kojem će se predložiti mjere koje će se usvojiti po hitnom postupku s ciljem zaustavljanja daljeg pada ekonomskih aktivnosti i zaposlenosti, te odliva kvalifikovane radne snage u zemlje Zapadne Evrope.

Ministar Zukić je naveo da se u predstojećem periodu mora raditi na usvajanju izmjena i dopuna zakona kao što su Zakon o obrtu, Zakon o poticanju razvoja male privrede i Zakon o poslovnoj infrastrukturi koji bi trebali stimulirati privredni rast i zapošljavanje. Naglasio je složenost političkih odnosa i administrativnog uređenja unutar FBiH zbog čega je došlo do kašnjenja u donošenju i usvajanju mjera.

Direktor UPFBiH Mladen Pandurević u svom zaključku apostrofirao je izlaganje profesorice Obradović u kojem je istakla da mjere socijalne politike mogu biti dopuna mjerama ekonomske politike čemu će se posvetiti posebna pažnja prilikom sačinjavanja prijedloga novog seta mjera. Istakao je da je Udruženje poslodavaca FBiH do sada sačinilo dva seta mjera, od kojih je jedan set usvojen a drugi upućen u parlamentarnu proceduru. Naveo je da će zaključci sa konferencije biti inkorporirani u prijedlog novih mjera koji će biti upućen vlastima.

## Zaključci sa video konferencije „Nužnost kreiranja novog seta mjera za saniranje ekonomskih posljedica pandemije koronavirusa“

Udruženje poslodavaca Federacije BiH organizovalo je video konferenciju "Nužnost kreiranja novog seta mjera za saniranje ekonomskih posljedica pandemije koronavirusa".



Učesnici konferencije su zaključili da većina zemalja svijeta, a među kojima i BiH, nije adekvatno reagirala na pojavu pandemije koronavirusa. Djelimično je to razumljivo pošto se BiH oslanja na režim valutnog odbora, pa nije u mogućnosti monetarnu politiku i politiku deviznog kursa za svladavanje negativnih eksternih šokova, nego naglasak staviti na fiskalnu politiku (koja opet traži vrijeme za provođenje procedura) i finansijsku politiku, koje nisu bile dovoljno pripremljene za djelovanje u odnosnim

situacijama. Svi učesnici konferencije su jednoglasno zaključili da se hitno mora pristupiti kreiranju novog seta mjera za saniranje ekonomskih posljedica pandemije koronavirusa. Identifikovane mjere koje je potrebno donijeti su:

### **1. Kratkoročne mjere:**

#### ***a) mjere za poboljšanje likvidnosti***

- Davanje poticaja privredi targetiranim prema djelatnosti, geografskom području, tržišnim uslovima i dr.
- Očuvanje likvidnosti preduzeća kroz izmjene Zakona o PDV-u (pomjeranje rokova za plaćanje poreza i akciza, kao i uvođenje obročnog plaćanja istih, akontacija na plaćanje poreza na dobit, brži povrat i sl.)
- Smanjenje fiskalnog opterećenja preduzeća (ukidanjem i racionalizacijom određenih parafiskaliteta)

#### ***b) mjere za povećanje zaposlenosti:***

- Angažovanje sredstava Fonda za osiguranje od nezaposlenosti
- Ublažavanje (smanjenje) strukturnoga nesklada između ponude i potražnje radne snage.
- Usklađivanje ponude sa potražnjom radne snage kvantitativno i kvalitativno

#### ***c) povećanje otpornosti i održivosti privrede***

- Mjerama za poticanje potrošnje
- Podizanja konkurentske sposobnosti domaćih preduzeća
- Repozicioniranje firmi u globalnim lancima vrijednosti u skladu sa trendom povećanja nacionalnog pristupa
- Povećanje izvoza

## **2. Srednjoročne mjere:**

- Podržavati transfer i unaprjeđenje tehnologija i poboljšanje vještina uvođenjem centara izvrsnosti na razini regija/kantona
- Povećanje razina štednje i investicija uvođenjem novih institucija, instrumenata i mehanizama
- Uvođenje politika politika produktivnosti i lanaca vrijednosti
- Zakonska reforma oblasti javnih prihoda
- Usvajanje inicijative Udruženja poslodavaca FBiH „20+5+6“ koje će rezultirati smanjenjem nezaposlenosti, povećanjem plaća, smanjenjem troškova poslovanja, smanjenjem sive ekonomije, poboljšanjem fiskalne discipline, pojednostavljenjem i smanjenjem administrativnih procedura i harmonizacijom propisa i usklađivanjem sa direktivama EU.

## **3. Dugoročne mjere:**

- Unapređenje i diverzifikacija finansijskog sektora (uvođenje štedno-kreditnih zadruga)
- Uvođenje inovacijskog sistema i inovacijske politike u funkciji jačanja istraživačko-razvojnih aktivnosti i povezivanja privrede i naučno-istraživačkih institucija (formiranje Fonda za tehnologiju, istraživanje i razvoj FBiH i kantonalnih naučno-tehnoloških centara)
- Digitalizacija javne uprave i poslovanja privatnih preduzeća
- Racionalizacija tekuće javne potrošnje i povećanje javnih investicija, restrukturiranje javnih preduzeća i otklon od političkog uticaja od stranaka na vlasti
- Jačati zaštitu intelektualnog vlasništva
- Pružati podršku ekološkim inovacijama u privatnom i javnom sektoru
- Osigurati zaštitu i funkcioniranje kritične infrastrukture, razvijati vještačku inteligenciju i njenu primjenu, podržavati razvoj hladnih lanaca vrijednosti, itd.

Također je zaključeno da se trebaju održati hitne sjednice Vijeća ministara BiH, Vlade Federacije BiH, Parlamenta BiH i Parlamenta FBiH na kojima će se razmatrati prijedlog novog seta mjera, te da se formiraju tijela koja će biti u stalnom zasjedanju a koja će sačinjavati predstavnici izvršne i zakonodavne vlasti, Udruženja poslodavaca FBiH, sindikata i akademske zajednice. Pored toga, potrebno je formirati stručne grupe koje će sačinjavati poslodavci iz određene djelatnosti koje će predlagati mjere specifične za određenu privrednu granu.



Identifikovana su i tri pravca istraživanja koja je potrebno poduzeti kako bi se kreirao kvalitetan set mjera za saniranje ekonomskih posljedica koronavirusa, i to:

- Analiza mjera fiskalne i finansijske politike koje je neophodno kreirati i usvojiti
- Analiza mjera socijalne politike koje će doprinijeti rastu privrede i zaposlenosti
- Analiza mjera politike subvencioniranja privrede.

Podvlačimo da je najveća opasnost u tome da kombinacija zdravstvene krize, kad ljudi umiru, i ekonomske krize, kad ljudi ne rade, potkopa legitimnost države i pogorša već postojeće probleme zbog čega može biti izuzetno teško vratiti društvo u manje-više stabilnu socijalnu ravnotežu utoliko više što zdravstvena i ekonomska kriza mogu lako i brzo postati politička i ustavna kriza.

## UPFBiH zatražilo sastanke sa predsjednicima vodećih političkih stranaka u BiH

Udruženje poslodavaca FBiH zatražilo je sastanke sa predsjednicima vodećih političkih stranaka u BiH, a kako bi razgovarali o mjerama za ublažavanje posljedica ekonomske krize i izgradnju adekvatnog poslovnog ambijenta.

### Delegacija

poslodavaca će na sastancima urgirati da parlamentarne stranke učine dodatne napore i što prije usvoje reformske zakone, koji su i dalje na čekanju u Parlamentu FBiH. Inicijative koje je predložilo Udruženje poslodavaca FBiH



dovele bi do neophodnog rasterećenja privrede i omogućili povećanje prihoda zaposlenika i očuvanja radnih mjesta.

Nakon pojedinačnih sastanaka, Udruženje će organizovati zajednički sastanak sa predsjednicima vodećih političkih stranaka u BiH. Očekuje se da će se zajednički sastanak održati početkom juna.



## Delegacija UPFBiH sa predsjednikom HDZ-a BiH



Delegacija Udruženja poslodavaca FBiH, predsjednik Adnan Smailbegović, direktor Mladen Pandurević i vlasnik kompanije Violeta d.o.o. Petar Ćorluka održali su sastanak sa predsjednikom HDZ-a BiH Draganom Čovićem.

Razgovarano je o izazovima s kojima se poslodavci trenutno suočavaju zbog novonastalih okolnosti te preprekama koje je neophodno što prije otkloniti. Predstavnici Udruženja poslodavaca naglasili su da pomoci postoje, ali da ih je potrebno ubrzati kako bi se olakšalo svim privrednicima bržim i efikasnijim rješenjima.

Predstavnici poslodavaca također su podsjetili na dva zakonska prijedloga koja imaju za cilj reformirati, modernizirati i ubrzati ekonomski i privredni sektor, a koja su i dalje na čekanju u Parlamentu Federacije BiH.

Navedene mjere dovele bi do prijeko potrebnog rasterećenja u privrednom sektoru i omogućile poboljšanje i povećanje prihoda zaposlenika, naveli su predstavnici poslodavaca.

Čović je istaknuo kako je saradnja i zajedničko djelovanje privatnog sektora i predstavnika izvršne i zakonodavne vlasti prijeko potrebna i nužna na svim nivoima. Pojava pandemije zakočila je sve reformske procese i bilo je potrebno prilagoditi se takvim okolnostima, ali i nadomjestiti gubitke koji su uslijedili, dodao je Čović.


On je dao punu podršku i pomoć inicijativama i predlozima poslodavaca, te pozvao na zajedničko djelovanje kako bi reformske procese ubrzali i unijeli novu dinamiku u sljedećem razdoblju.

## UPFBiH traži da se stavi van snage Odluka o propisivanju mjera neposredne kontrole cijena

Udruženje poslodavaca FBiH je uputilo dopis ministru trgovine FBiH Zlatanu Vujanoviću u kojem se traži da se Odluka o propisivanju mjera neposredne kontrole cijena („Službene novine Federacije BiH“, broj: 25/20) stavi van snage.



Naime, na području Federacije BiH ukinuto je stanje prirodne nesreće, a Odluka je donesena u vrijeme proglašenja stanja nesreće zbog pojave koronavirusa na području Federacije BiH. Donošenje Odluke bila je jedna od mjera za sprečavanje negativnih ekonomskih posljedica izazvanih



pojavom koronavirusa. Obzirom da je prestalo stanje nesreće, a ujedno i uvjeti za propisivanje mjera kontrole cijena, neophodno je da se Odluka stavi van snage.

U većini zemalja u regionu odluke o mjerama za kontrolu cijena prestale su važiti, a u zemljama u kojima nije prestalo važenje istih preduzete su potrebne aktivnosti za ukidanje Odluka.

Također, i u Republici Srpskoj je predmetna odluka stavljena van snage. Postojanje Odluke samo u jednom entitetu dovodi do nejednakih tržišnih uslova i velikih gubitaka poslovnim subjektima koji posluju na području Federacije BiH i Republike Srpske, navodi se u dopisu.

## **Na inicijativu UPFBiH donesena Odluka o prestanku važenja Odluke o propisivanju mjera neposredne kontrole cijena**

Udruženje poslodavaca Federacije Bosne i Hercegovine je sredinom juna uputilo Ministarstvu trgovine FBiH zahtjev za stavljanje van snage Odluke o propisivanju mjera neposredne kontrole cijena.

U zahtjevu se navodi da je neophodno da se Odluka stavi van snage obzirom da je prestalo stanje nesreće, te da je ista odluka u većini zemalja u regionu prestala važiti.

Vlada Federacije Bosne i Hercegovine je na sjednici održanoj 25. juna 2020. godine donijela Odluku o prestanku važenja Odluke o propisivanju mjera neposredne kontrole cijena, donesene 9. aprila ove godine.

Ova mjera imala je za cilj zaštitu ekonomskih interesa građana u Federaciji BiH, suzbijanje nerealnog utvrđivanja cijena i sprječavanja eventualnog nepoštenog i neodgovornog ponašanja učesnika u lancu snabdijevanja. U Federaciji BiH u periodu proglašenog stanja nesreće usljed pandemije COVID-19 došlo je do prekomjerne kupovine određenih vrsta prehrambenih i higijenskih proizvoda i stvaranja zaliha od strane građana, što je moglo uzrokovati vještačku nestašicu određenih proizvoda na tržištu.



Ovom mjerom osiguran je uredan lanac snabdijevanja potrošača u Federaciji BiH i u proteklom periodu ova odluka je dala očekivane rezultate.

Nakon što je 29.5.2020. godine Vlada FBiH ukinula stanje prirodne nesreće, na tržištu Federacije BiH, odnosi ponude i potražnje, kao i kretanja cijena proizvoda tretiranih Odlukom o propisivanju mjera neposredne kontrole cijena, stabilizirani su cijene i snabdijevanje tržišta, te su se na taj način stekli uslovi za stavljanje van snage ove odluke.

## Na inicijativu UPFBiH Vlada FBiH utvrdila Prijedlog zakona o dopunama Zakona o vijeću zaposlenika

Na inicijativu Udruženja poslodavaca FBiH, Vlada Federacije BiH je, na današnjoj sjednici u Sarajevu, utvrdila i Parlamentu FBiH na usvajanje uputila Prijedlog zakona o dopunama Zakona o vijeću zaposlenika. Udruženje je tražilo izmjene Zakona o vijeću uposlenika a kako bi se mogle primjenjivati odredbe Zakona o radu koji je također u parlamentarnoj proceduri.

U član 24. dodana su dva nova stava koja se odnose na rokove.


Kako je precizirano, izuzetno, za vrijeme proglašenja stanja prirodne i druge nesreće, kao i za vrijeme vanrednog stanja u FBiH kojeg su proglasile nadležne institucije, poslodavac nije obavezan da primjenjuje rok od 30 dana u kojem



je Vijeću uposlenika dužan radi konsultacija dostaviti odluke značajne za prava i interese uposlenika.

Također je, sa sedam na pet dana, za vrijeme proglašenja stanja prirodne i druge nesreće i vrijeme vanrednog stanja, Vijeću zaposlenika skraććen rok za izjašnjavanje.

Prijedlog zakona o dopunama Zakona o vijeću zaposlenika možete pročitati [OVDJE](#).



## **Udruženje poslodavaca FBiH pripremilo i članstvu dostavilo članstvu informaciju o umanjenju akontacije poreza na dobit**

Prema članu 52. stav 1. Zakona o porezu na dobit FBiH („Službene novine FBiH“, broj: 15/16 i 15/20) porezni obaveznik u toku godine vrši plaćanje akontacija poreza na dobit u jednakim mjesečnim iznosima.

U istom članu, stavu 3. propisano je da se akontacije obračunavaju na osnovu prijave poreza na dobit prethodnog poreznog perioda i takav iznos akontacije se plaća sve do podnošenja nove porezne prijave.

Obzirom na pojavu korona virusa u Federaciji BiH i na njegov negativan uticaj na poslovanje privrednih subjekata, obavještavamo naše članice da prema članu 52. stav 4. Zakona o porezu na dobit, mogu Poreznoj upravi FBiH podnijeti zahtjev za izmjenu mjesečnog iznosa akontacije poreza na dobit u slučaju „prirodnih i drugih nesreća koje su bitno uticale na poslovanje poreznog obaveznika" ili „kada postoji osnovana pretpostavka da će porezni obaveznik poslovati sa gubitkom, uz uvjet da tu pretpostavku osnovano može dokazati".

Porezni obaveznik je u zahtjevu dužan navesti i obrazložiti razloge, te priložiti dokaze u vezi navedenih razloga, za izmjenu visine mjesečnog iznosa akontacije poreza na dobit.

Novi mjesečni iznos akontacije poreza na dobit utvrđuje se Rješenjem Porezne uprave FBiH, a novi iznos se primjenjuje za naredni mjesec u odnosu na mjesec u kojem je izdato Rješenje.

Shodno navedenom, a u skladu sa razgovorom sa predstavnicima Federalnog ministarstva finansija, gdje nam je rečeno da se akontacija poreza na dobit za 2020. godinu ne mora plaćati, odnosno da ista može da bude čak i u iznosu jedne marke, preporučujemo našim članicama da se obrate sa zahtjevom Poreznoj upravi FBiH za izmjenu mjesečnog iznosa akontacije poreza na dobit, kako je gore navedeno.

### **UPFBiH uputilo dopis Ministarstvu finansija u vezi nemogućnosti dobijanja potvrde o izmirenim obavezama po osnovu javnih prihoda, koja im je neophodna za učešće na tenderima**

Udruženje poslodavaca FBiH uputilo je dopis ministrici finansija FBiH u kojem se traži da Ministarstvo uputi Poreznoj upravi FBiH Uputstvo za postupanje te da se hitno pristupi izdavanju potvrda poreskim obaveznicima.

Naime, Udruženju poslodavaca FBiH obratio se veći broj članica koji imaju problem sa dobijanjem potvrde o izmirenim obavezama po osnovu javnih prihoda, a koja je neophodna za učešće na tenderima.

Razlog za nedobijanje potvrde su neizmirene obaveze po osnovu poreza na dobit. Međutim, rok za podnošenje prijave poreza na dobit za 2019. godinu zbog pojave korona virusa produžen na 30.04.2020. godine, a prema članu 83. Pravilnika o primjeni Zakona o porezu na dobit, obaveza uplate razlike poreza na dobit je u roku od 20 radnih dana od dana podnošenja porezne prijave, te obaveza plaćanja poreza na dobit nije ni mogla biti izmirena.

Udruženje zahtjeva da se hitno pristupi izdavanju potvrda poreskim obaveznicima, kako bi mogli ostvariti učešće na tenderima i priložiti neophodnu tendersku dokumentaciju.



## **Usvojena inicijativa UPFBiH da pravo na isplatu dijela minimalne neto plaće imaju i privredni subjekat koji imaju sjedište u drugim kantonima, a poslovne jedinice u KS**

Usvojena je inicijativa Udruženja poslodavaca FBiH u kojoj se tražilo da se pravo na subvencioniranje dijela plaće proširi i na privredne subjekte koji imaju sjedište u drugim kantonima, a poslovne jedinice u KS, odnosno, za radnike koji su prijavljeni sa mjestom rada na području Kantona Sarajevo.

Na sjednici Vlade Kantona Sarajevo, održanoj 02. juna 2020. godine, usvojena je Uredba o postupku finansiranja dijela minimalne neto plaće u Federaciji BiH za mjesec april i maj 2020. godine.

Prema Uredbi, pravo na isplatu dijela minimalne mjesečne neto plaće za mjesec april i maj 2020. godine mogu ostvariti poslovni subjekti, odnosno pravna i fizička lica koja ispunjavaju sljedeće uslove:

- samostalno obavljaju registrovanu poslovnu djelatnost, koji imaju sjedište u Kantonu Sarajevo ili im je poslovna jedinica sa sjedištem u Kantonu Sarajevo ili sa sjedištem izvan Kantona Sarajevo na području FBiH, ali se u Kantonu Sarajevo nalazi poslovna jedinica koja je u sastavu poslovnog subjekta;
- ukoliko su u mjesecu aprilu 2020. godine, odnosno u maju 2020. godine imali pad prometa u odnosu na prosječni mjesečni promet u 2019. godini, kako slijedi: veći od 40 posto do 70 posto ili veći od 70 posto;
- da do dana objave Javnog poziva imaju izvršene obaveze po osnovu javnih prihoda sa danom 29.02.2020. godine;
- da su zadržali isti broj uposlenika na dan 30.04.2020. godine, odnosno na dan



31.05.2020. godine u odnosu na dan 29.02.2020. godine, osim onih radnika kojima je istekao ugovor o radu ili koji su sporazumno prekinuli radni odnos.

„Pozdravljamo usvajanje Uredbe Vlade Kantona Sarajevo, kojom je uvažena naša inicijativa da se subvencioniraju plaće i kompanijama koje imaju sjedišta u drugim kantonima, a na području KS poslovne jedinice. Na ovaj način se dovode u ravnopravan položaj prvenstveno uposlenici, ali i kompanije iz cijele FBiH. Usvajanjem ove Uredbe, Vlada KS je dala značajan doprinos očuvanju radnih mjesta, ali i pomogla značajnom broju kompanija u prevazilaženju krize izazvane pandemijom koronavirusa“, ističu iz UPFBiH.


Uredbu možete pročitati [OVDJE](#).

## UPFBiH traži da se za utvrđivanje pada prometa izuzme promet po osnovu prodaje sopstvene imovine



Zbog problema utvrđivanja pada prometa od 20 posto radi ostvarivanja prava na subvencioniranje doprinosa koje je propisano Zakonom o ublažavanju negativnih ekonomskih posljedica, Udruženju poslodavaca FBiH obratio se veći broj članica.

Naime, da bi održale likvidnost, sačuvale radna mjesta i isplatile plaću radnicima, poreze i doprinose veći broj kompanija je prodao ili želi da proda svoju imovinu.



Budući da prema Zakonu o fiskalnim sistemima postoji obaveza evidentiranja svakog pojedinačno ostvarenog prometa usluga i roba preko fiskalnih uređaja, te je ujedno i prodaja sopstvene imovine registrovana kao promet preko fiskalnih sistema. Zbog toga je kod pojedinih poslovnih subjekata iskrivljena slika o stvarnom padu prometa i oni ne mogu da iskažu uvjetovani pad prometa od 20 posto, a na prodaju sopstvene imovine bili su prinuđeni kako bi isplatili plaće radnicima i sačuvali radna mjesta. Ukoliko ne iskažu pad prometa kompanije neće moći ostvariti pravo na subvencije, što ujedno znači da neće biti motivisane za preduzimanje mjera kojima bi se očuvala radna mjesta.

Prema članu 4. stav 4. Zakona o ublažavanju negativnih ekonomskih posljedica ostvareni promet utvrđuje Porezna uprava Federacije Bosne i Hercegovine na osnovu podataka o evidentiranom prometu putem fiskalnih sistema na serveru Porezne uprave.

Shodno navedenom, Udruženje poslodavaca FBiH je uputila je dopis Ministarstvu finansija FBiH u kojem se traži da Ministarstvo izda uputu Poreznoj upravi FBiH da se prilikom utvrđivanja ispunjenosti uslova za subvencioniranje doprinosa, iz ukupno evidentiranog prometa putem fiskalnih sistema, izuzima promet po osnovu prodaje sopstvene (pokretne i nepokretne) imovine, budući da se u tom slučaju se ne radi o prometu od obavljanja registrovane privredne djelatnosti.

## **Odgovor Ministarstva finansija o zahtjevu za subvencioniranje doprinosa**

Udruženje poslodavaca FBiH je početkom juna uputilo dopis Ministarstvu finansija FBiH u kojem se tražilo da Ministarstvo izda uputu Poreznoj upravi FBiH da se prilikom utvrđivanja ispunjenosti uslova za subvencioniranje doprinosa, iz ukupno evidentiranog prometa putem fiskalnih sistema, izuzima promet po osnovu prodaje sopstvene (pokretne i nepokretne) imovine, budući da se u tom slučaju ne radi o prometu od obavljanja registrovane privredne djelatnosti.

Ministarstvo finansija FBiH odgovorilo je Udruženju da ukoliko je podnosilac zahtjeva za subvencioniranje, evidentirao promet na fiskalnom uređaju za koji smatra da nije trebao sukladno odredbama Zakona o fiskalnim sistemima



(Službene novine FBiH 81/09), Porezna uprava je dužna riješiti ovo prethodno pitanje, prije odlučivanja o zahtjevu za subvencioniranje.

Dopis Ministarstva možete pročitati [OVDJE](#).

## **UPFBiH o mjerama ublažavanja ekonomskih posljedica**

Udruženje poslodavaca FBiH organizovalo je radni ručak sa predstavnicima velikih kompanija. Sastanku su prisustvovali vlasnici Hife Oil i Hifa Petrol Ahmetlić Izudin i Ahmetlih Hajrudin, vlasnik kompanije Violeta Petar Ćorluka, vlasnik Binga Senad Džambić, vlasnik TMD Gruop Adem Hanić, generalni direktor Konzuma Nihad Imširović, vlasnica i direktorica GS-TMS Snježana Koepruner, vlasnik Alme Ras Kemal Memagić, predstavnici Coca-cola BH Dušan Mitrov i Haris Muslić, te vlasnik kompanije Planet Krasnodar Petrović. Ispred Udruženja poslodavaca prisustvovali su predsjednik i direktor Adnan Smailbegović i Mladen Pandurević.

Na sastanku se razgovaralo o budućim pravcima djelovanja Udruženja poslodavaca, odnosno o mjerama za ublažavanje ekonomskih posljedica usljed pandemije Covida-19.



## UPFBiH traži stav ministarstva po pitanju nadležnosti Porezne uprave FBiH za kontrolu članarine u obrtničkim komorama

Udruženje poslodavaca Federacije Bosne i Hercegovine uputilo je dopis Ministarstvu razvoja, poduzetništva i obrta FBiH u kojem se traži stav po pitanju nadležnosti Porezne uprave FBiH za kontrolu članarine u obrtničkim komorama.

Naime, veći broj obrtnika, članova Udruženja poslodavaca FBiH, uputio je žalbe Udruženju jer ne mogu dobiti potvrdu o izmirenim javnim prihodima od strane Porezne uprave zbog neizmirenih članarina obrtničkoj komori.

Obzirom da je članom 3. Zakona o pripadnosti javnih prihoda u Federaciji BiH propisano da se javni prihodi raspodjeljuju između Federacije, kantona i jedinica lokalne samouprave, a služe za finansiranje funkcija Federacije, Javnog preduzeća Ceste



Federacije Bosne i Hercegovine, javnih kantonalnih ustanova za ceste i općinskih ili gradskih organa za lokalne ceste i gradske ulice, kantona i jedinica lokalne samouprave, te Udruženje smatra da članarina obrtničkoj komori nije javni prihod.

Međutim, član 62. stav 2. Zakona o obrtu i srodnim djelatnostima propisuje da

kontrolu naplate članarine vrši nadležni poreski ured. Također, član 1. Zakona o poreznoj upravi Federacije BiH ("Službene novine FBiH", broj: 33/02, 28/04, 57/09, 40/10, 27/12, 7/13, 71/14 i 91/15) propisuje da Porezna uprava provodi i izvršava aktivnosti iz oblasti članarina obrtničkih komora. Bez obzira što postoji zakonski osnov ne čini nam se logičnim da je to u nadležnosti Porezne uprave.

Udruženje je stava da se članarina obrtničkoj komori mora plaćati, ali Udruženje također izražava sumnju da Porezna uprava u okviru svojih nadležnosti treba da ima kontrolu članarina obrtničkoj komori. Članarina obrtničkih komora je prihod posebnih javnopravnih tijela, odnosno ista se uplaćuje na račun obrtničke komore kantona prema sjedištu obrta.

Isti zahtjev je upućen i Ministarstvu finansija FBiH gdje se traži preispitivanje Zakona o poreskoj upravi FBiH ("Službene novine FBiH", broj: 33/02, 28/04, 57/09, 40/10, 27/12, 7/13, 71/14 i 91/15) u dijelu koji propisuje nadležnost Porezne uprave za članarine u obrtničkim komorama.

## **UPFBiH zatražilo dostavu Prijedloga izmjene člana 22. Pravilnika o primjeni Zakona o PDV-u**

Udruženje poslodavaca FBiH je informisano da je pripremljen prijedlog za izmjenu Pravilnika o primjeni Zakona o porezu na dodatnu vrijednost, odnosno člana 22. Pravilnika, te je od Uprave za indirektno oporezivanje BiH zatraženo dostavljanje tog prijedloga.

Izmjenom Pravilnika omogućila bi se naplata PDV-a od stranih prevoznika, po inicijativi UPFBiH.

## Predstavници UPFBiH na javnoj raspravi o Nacrtu zakona o reprezentativnosti sindikata i udruženja poslodavaca



Predstavnici Udruženja poslodavaca FBiH, direktor Mladen Pandurević i sekretar Mersiha Jusić, učestvovali su javnoj raspravi o Nacrtu zakona o reprezentativnosti sindikata i udruženja poslodavaca.

Direktor Udruženja poslodavaca FBiH Mladen Pandurević obrazložio je primjedbe Udruženja na Nacrt zakona, koje su ranije u pisanom obliku dostavljeni Ministarstvu rada i socijalne politike FBiH.

Ministarstvo će razmotriti sve iznese primjedbe sa javne rasparve i one već ranije dostavljene, te će relevantne uzeti u obzir i ugraditi u konačan tekst prijedloga zakona.

Primjedbe Udruženja možete pročitati [OVDJE](#).



## Sastanak Sindikata trgovine i poslodavaca iz djelatnosti trgovine

Predstavnici Grupacije poslodavaca iz oblasti trgovine pri Udruženju poslodavaca Federacije Bosne i Hercegovine na čelu sa predsjednikom Edinom Ibrahimovićem, održali su sastanak sa predsjednicom Sindikata trgovine i uslužnih djelatnosti Bosne i Hercegovine Mersihom Beširović.

Sastanku je prisustvovao i direktor Udruženja poslodavaca FBiH Mladen Pandurević.

U konstruktivnom dijalogu sugovornici su razgovarali o izmjenama i dopunama Zakona o radu i Kolektivnom ugovoru za djelatnost trgovine.

Također, razgovarano je o inicijativi Udruženja poslodavaca FBiH da se sredstva za osiguranje od nezaposlenosti koriste za očuvanje radnih mjesta, odnosno za isplatu naknade u visini minimalne plaće radnicima.



## Reagovanje UPFBiH na eKonsultacijama na Nacrta uputstva o provođenju postupka povrata poreza na dodatu vrijednost stranim poreskim obavezniciima

Nakon prikupljenih primjedbi i sugestija od strane članica, Udruženje poslodavaca FBiH je iste, po pitanju Nacrta uputstva o provođenju postupka povrata poreza na dodatu vrijednost stranim poreskim obavezniciima, dostavila na eKonsultacije.



Naime, Uputstvom o provođenju postupka povrata poreza na dodatu vrijednost stranim poreskim obavezniciima uređuje se način i postupak dobijanja evidencionog broja kod Uprave za indirektno oporezivanje, uslovi i način zastupanja pred Upravom, te uslovi, način i provođenje postupka povrata poreza na dodatu vrijednost obavezniciima koji nemaju uspostavljeno poslovanje u Bosni i Hercegovini.

Upravni odbor UIO usvojio je Pravilnik o izmjenama i dopunama Pravilnika o primjeni Zakona o porezu na dodatu vrijednost kojim se omogućava povrat PDV-a stranim poreskim obavezniciima kao i uklanjaju se ograničenja koja trenutno imaju bh. poreski obaveznici u državama koje trenutno primjenjuju načelo uzajamnosti ili reciprociteta. Shodno tome, neophodno je donijeti i Uputstvo kojim će se bliže urediti postupak povrata poreza na dodatu vrijednost stranim poreskim obavezniciima.



## Predstavnicima Sindikata i poslodavaca iz oblasti trgovine predstavljena „Povelja o poštivanju ljudskih prava u poslovanju“



Predstavnici Udruženja poslodavaca FBiH na sastanku održanom 12. juna 2020. godine prezentirali su predstavnicima Sindikata trgovine i poslodavcima iz djelatnosti trgovine „Povelju o poštivanju ljudskih prava u poslovanju“, koja je

nastala u okviru inicijative „Poboljšanje ljudskih prava u privrednom sektoru u BiH“. Inicijativu provodi Institut za razvoj mladih KULT u saradnji s Udruženjem poslodavaca FBiH, a uz finansijsku podršku Europske unije.

Povelja se sastoji od 15 tačaka koje se tiču sprječavanja narušavanja ljudskih prava, uključivanja zainteresiranih strana radi uvažavanja njihovog glasa i potreba, opredijeljenosti za jednak odnos prema svima, očuvanja radnog okruženja, zabrane prinudnog rada i zabrane umiješanosti u trgovinu ljudima, prava na sistem komunikacije koji maksimalno štiti povjerljivost za sve prijave zaposlenih.

Prisutni su pozdravili napore KULT-a i Udruženja i njihovu opredijeljenost za poštivanje i zaštitu ljudskih prava. Zaključeno je da će predstavnici Udruženja poslodavaca FBiH u narednom periodu promovisati Povelju kako bi omogućili da veći broj privrednih društava uzme Povelju za posebnu vrijednost svoje kompanije.

## Predstavници UPFBiH i KULT-a o aktivnostima projekta "Poboljšanje ljudskih prava u privrednom sektoru u BiH"

Predstavnici Udruženja poslodavaca FBiH i Instituta za razvoj mladih KULT održali su sastanak s ciljem utvrđivanja daljih koraka na implementaciji zajedničkog projekta „Poboljšanje ljudskih prava u privrednom sektoru u BiH“.



U okviru inicijative „Poboljšanje ljudskih prava u privrednom sektoru u BiH“ koju provodi ove dvije organizacije uz finansijsku podršku Evropske unije, kreiran je i dokument "Povelja o poštivanju ljudskih prava u poslovanju". Poveljom o poštivanju ljudskih prava u poslovanju, kompanije u

BiH javno iskazuju svoju opredijeljenost za poštivanje i zaštitu ljudskih prava. U Povelji je istaknuto da se kompanije vode važećim propisima u BiH i odredbama najznačajnijih međunarodnih dokumenata u oblasti poštivanja i zaštite ljudskih prava, prvenstveno Vodećih načela o poslovanju i ljudskim pravima Ujedinjenih naroda.

Na sastanku je dogovoreno da će Udruženje poslodavaca FBiH, u skladu sa svojim projektnim obavezama i aktivnostima, nastaviti sa promocijom Povelje, a kako bi je potpisalo što veći broj poslodavaca te i na taj način pokazali svoju društvenu odgovornost.

## Sastanak predstavnika UPFBiH i AMFI-a

Direktor UPFBiH Mladen Pandurević održao je početkom juna sastanak sa predsjednicom predsjednica Udruženja mikrokreditnih organizacija u BiH AMFI Elmom Zukić. Na sastanku je razgovarano o mogućnostima saradnje na zajedničkim projektima.




Predsjednica Udruženja mikrokreditnih organizacija u BiH izrazila je interes pristupanja AMFI-a Udruženju poslodavaca FBiH, a kako bi udruženim snagama djelovali u pravcu razvoja mikrofinansijskog sektora kroz donošenje odgovarajuće zakonske regulative.

## Kroz projekat jačati saradnju organizacija civilnog društva i vlasti

Predstavnik UPFBiH Husein Al-Baldawi i tim lider projekta "Jačanja kapaciteta vladinih institucija za uključivanje organizacija civilnog društva u procese donošenja odluka u Bosni i Hercegovini" Igor Stojanović održali su sastanak 11. juna 2020. godine putem Zoom aplikacije na kojem su razgovarali o projektu i njegovim ciljevima.

Opći cilj projekta je pružiti podršku Vijeću ministara BiH, entitetskim i kantonalnim vladama i Vladi Brčko Distrikta kako bi unaprijedili postojeće i razvili nove institucionalne mehanizme saradnje sa organizacijama civilnog društva. Jedan od ciljeva projekta je pružanje podrške akterima socijalnog dijaloga, te je razgovarano na koji način projekat može podržati poslodavačka udruženja u Bosni i Hercegovini.



## Na inicijativu Grupacije poslodavaca USK pri UPFBiH donijet Pravilnik o raspodjeli sredstava namjenjenih za subvencioniranje naknada poslovnim subjektima Grada Bihaća

Po proglašenju stanja nesreće uzrokovane pojavom koronavirusa na području Federacije BiH Grupacija poslodavaca USK pri Udruženju poslodavaca FBiH poduzela je brojne aktivnosti za ublažavanje ekonomskih posljedica. Jedna od tih mjera rezultirala je donošenjem Pravilnika o kriterijima, načinu i postupku raspodjele sredstava Grada Bihaća namijenjenih za subvencioniranje naknada poslovnim subjektima Grada Bihaća u cilju sanacije negativnih ekonomskih posljedica uzrokovanih pandemijom koronavirusa (Covid-19), koji je donio gradonačelnik Grada Bihaća.

Ovim pravilnikom utvrđuju se korisnici prava na subvencije, kriteriji, način i postupak raspodjele sredstava Grada Bihaća u svrhu subvencioniranja plaćanja:

- naknade za privremeno korištenje javnih površina,
- zakupa poslovnih prostora u vlasništvu i pod upravom Grada Bihaća, kao i poslovnih prostora kojima upravlja JU „Kulturni centar“ Bihać i JU za sport, odmor i rekreaciju Bihać,
- komunalne naknade i
- komunalnih usluga (odvoz komunalnog otpada i snadbijevanje pitkom vodom).

Pravilnik možete preuzeti na [LINKU](#).



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**